

傷寒續論
下



之。於是動數之脉變遲。而在表之證。變結胸矣。動數變遲。三十六字。形容結胸之狀殆盡。蓋動數爲欲傳之脉。變遲則力綿勢緩而不能傳。且有結而難開之象。膈中之氣。與外實之邪兩相格鬪。故爲拒痛。胃中水穀所生之精悍。因悞下而致空虛。則不能藉之以衝開外邪。反爲外邪衝動其膈。於是正氣往逐邪逼之界。覺短氣不足以息。更煩躁有加。遂至神明不安。無端而生懊懣。凡此皆陽邪內陷所致也。

結胸者。項亦強如柔瘕狀。下之則和。宜大陷胸圓。

結胸而至頸項亦強。證愈篤矣。蓋胸間邪結緊實。項勢常昂。有似柔瘕之狀。然瘕病身首俱張。此但項強。原非瘕也。借此以驗胸邪十分緊逼。以大陷胸湯下之。恐過而不留。

卽以大陷胸圓下之。又恐滯而不行。故煮而連滓服之。然
後與邪相當。觀方中用大黃芒硝甘遂。可謂峻矣。而更加
葶藶杏仁。以射肺邪。而上行其急。煮時又倍加白蜜。以留
戀潤導之。而下行其緩。必識此意。始得用法之妙。

結胸證。其脉浮大者。不可下。下之則死。
胸既結矣。本當下以開其結。然脉浮大。則表邪未盡。下之
是令結而又結也。所以致死。此見一誤不堪再誤也。

結胸證悉具。煩躁者亦死。

亦字承上。見結胸證全具。更加煩躁。卽不下亦主死也。煩
躁曷爲主死耶。蓋邪結於胸。雖藉藥力以開之。而所以載
藥力上行者。胃氣也。胃氣克溢於津液之內。汗之津液一
傷。下之津液再傷。至熱邪搏飲結於當胸。而津液又急奔

以應上。正有不盡不已之勢。胃氣垂絕。能無敗乎。此結胸諸法。見幾於早。兢兢以滌飲爲先務。飲滌則津液自安矣。傷寒六七日結胸熱實。脈沉而緊。心下痛。按之石鞕者。大陷胸湯主之。

熱實二字。形容結胸之狀甚明。見邪熱填實於膈間也。前條言寸脈浮。關脈沉。此言脈沉緊更明。蓋緊脈有浮沉之別。浮緊主傷寒無汗。沉緊主傷寒結胸。則知結胸非中風下早而成也。

傷寒十餘日熱結在裏。復往來寒熱者。與大柴胡湯。但結胸無大熱者。此爲水結在胸脇也。但頭微汗出者。大陷胸湯主之。

治結胸證。所用陷胸之法者。以外邪挾內飲搏結胸間未

全入於裏也。若十餘日熱結在裏。則是無形之邪熱蘊結。必不定在胸上。而非結胸明矣。加以往來寒熱仍兼半表。當用大柴胡湯。兩解表裏之熱邪。於陷胸之義無取也。無大熱與上支熱實互意。內陷之邪。但結胸間。而表裏之熱反不熾盛。是爲水飲結在胸脇。其人頭有微汗。乃邪在高而陽氣不得下達之明徵。此則主用大陷胸湯。允爲的對。太陽病重發汗而復下之。不大便五六日。舌上燥而渴。日晡所小有潮熱。從心下至少腹鞭滿而痛不可近者。大陷胸湯主之。

不大便燥渴。日晡潮熱。少腹鞭滿。證與陽明頗同。但小有潮熱。則不似陽明之大熱。從心下至少腹。手不可近。則陽明又不似此大痛。因是辨其爲大陽結胸。兼陽明內實也。

緣誤汗誤下。重傷津液。不大便而燥渴潮熱。更加痰飲內結。必用陷胸湯。由胸脇以及胃腸。始得蕩滌無餘。若但下腸胃結熱。反遺膈上痰飲。則非法矣。

太陽少陽併病。而反下之。成結胸。心下鞭下利不止。水漿不下。其人心煩。

此條雖係併病。以其反下之而成結胸。當隨見所變之證。而歸重於結胸也。誤下之變。乃致結胸下利。上下交征。而陽明之居中者。水漿不入。心煩待斃。傷寒顧可易言哉。小結胸病。正在心下。按之則痛。脉浮滑者。小陷胸湯主之。

小結胸病。正在心下。則不似大結胸之高在心上也。按之則痛。比手不可近。則較輕也。而脉之浮又淺於沉。滑又緩於緊。可見其人外邪陷入原竅。痰飲素盛。挾熱邪而內

結。所以脉見浮滑也。黃連半夏栝實。藥味雖平。而泄熱散結。亦是突圍而入。所以名爲小陷胸也。寒實結胸。無熱證者。與三物小陷胸湯。白散亦可服。寒實結胸。乃寒飲結聚而無大熱也。意謂小陷胸半夏栝實。足以去其痰飲。又慮黃連難祛寒實。故又主白散。取巴豆之辛熱破結。貝母之苦寒開鬱。桔梗載之上涌爲的當耳。

已上結胸例

傷寒汗出解之後。胃中不和。心下痞鞭。乾噫食臭。脇下有水氣。腹中雷鳴下利者。生薑瀉心湯主之。汗後外邪雖解。然必胃氣安和。始得脫然無恙。以胃主津液故也。津液因邪入而內結。因發汗而外亡。兩相告匱。其

人心下必痞鞭。以伏飲搏聚。胃氣不足以開之也。胃病故乾噫食臭。食入而噯餒酸也。胃病故水入而傍滲脇肋也。胃中水穀不行。腹中必雷鳴而搏擊有聲。下利而清濁不分也。雖不由誤下。而且成痞。設誤下之。其痞結又當何似耶。

傷寒中風。醫反下之。其人下利日數十行。穀不化。腹中雷鳴。心下痞鞭而滿。乾嘔心煩不得安。醫見心下痞。謂病不盡。復下之。其痞益甚。此非結熱。但以胃中虛。客氣上逆。故使鞭也。甘草瀉心湯主之。

此條痞證。傷寒與中風互言。大意具見。可見病發於陰下之而成痞者。非指傷寒爲陰也。下利完穀腹鳴嘔煩。皆誤下而胃中空虛之互辭也。設不知此義。以爲結熱而復下。

之其痞必益甚。故重以胃中虛。客氣上逆。昭揭病因。方用甘草瀉心湯者。卽生薑瀉心湯。除去生薑。入參。而倍甘草。乾薑也。客邪乘虛結於心下。本當用入參。以誤而再誤。其痞已極。人參仁柔無剛決之力。故不宜用。生薑辛溫最宜用者。然以氣薄主散。恐其領津液上升。客邪從之犯上。故倍用乾薑代之以開痞。而用甘草爲君。坐鎮中州。庶心下與腹中漸至寧泰耳。今人但知以生薑代乾薑之僭。孰知以乾薑代生薑之散哉。但知甘草能增滿。孰知甘草能去滿哉。

傷寒五六日。嘔而發熱者。柴胡湯證具。而以他藥下之。柴胡證仍在者。復與柴胡湯。此雖已下之。不爲逆。必蒸蒸而振。却發熱汗出而解。若心下滿而鞭痛者。此爲結胸也。大陷胸湯

主之。但滿而不痛者。此爲痞。柴胡湯不中與之。宜半夏瀉心湯。

五六日嘔而發熱。爲太陽之本證。蓋嘔多屬陽明。然有太陽邪氣未罷。欲傳陽明之候。有少陽邪氣在裏。逆攻陽明之候。所以陽明致戒云。嘔多雖有陽明證。不可攻之。恐傷太陽少陽也。此本柴胡證。誤用下藥。則邪熱乘虛入胃。而膽却受寒。故於生薑瀉心湯中去生薑之走表。君半夏以溫膽。兼苓連以除胃中邪熱也。瀉心諸方。原爲瀉心下痞塞之痰飲水氣而設。此證起於嘔。故推半夏爲君耳。

傷寒大下後。復發汗。心下痞。惡寒者。表未解也。不可攻痞。當先解表。表解。乃可攻痞。解表宜桂枝湯。攻痞宜大黃黃連瀉心湯。

大下之後復發汗。先裏後表顛倒差誤。究竟已陷之邪。痞結心下。證兼惡寒。表邪不爲汗衰。卽不可更攻其痞。當先行解肌之法。以治外。外解已後。乃用大黃黃連攻其濕熱。凝聚之痞。方爲合法耳。

脈浮而緊。而復下之。緊反入裏。則作痞。按之自濡。但氣痞耳。心下痞。按之濡。其脈關上浮者。大黃黃連瀉心湯主之。心下痞而復惡寒汗出者。附子瀉心湯主之。

傷寒脈浮而緊。卽不可下。誤下而緊反入裏。則寒邪轉入轉深矣。外邪與飲搏結。故心下滿。鞭若按之自濡。而不滿。鞭乃是濁氣挾濕熱痞聚於心下。則與外邪無預也。濁氣上逆。惟苦寒可瀉之。上條大黃黃連瀉心之法。卽爲定藥。若惡寒汗出。雖有濕熱痞聚於心下。而挾陽虛陰盛之證。

故於大黃黃連瀉心湯內。另煎附子汁和服。以各行其事。共成傾否之功。卽一瀉心湯方中。法度森森若此。

傷寒胸中有熱。胃中有邪氣。腹中痛欲嘔吐者。黃連湯主之。傷寒邪氣傳裏。而爲下寒上熱也。胃中有邪氣。使陰陽不交。陰不得升而獨滯於下。爲下寒腹中痛。陽不得降而獨苑於上。爲胸中熱欲嘔吐。故於半夏瀉心湯中。除去黃芩而加桂枝。去黃芩者。爲其有下寒腹痛也。加桂枝者。用以散胸中之熱邪而治嘔吐也。經曰。上熱者瀉之以苦。下寒者散之以辛。故用黃連以瀉上熱。乾薑桂枝半夏以散下寒。人參甘草大棗以益胃而緩其中。此分理陰陽。和解上下之正法也。常因此而推及藏結之舌上胎滑。濕家之舌上如胎者。皆不出是方。

太陽中風。下利嘔逆。表解者乃可攻之。其人熱熱汗出。發作有時。頭痛。心下痞。鞭滿引脇下痛。乾嘔短氣。汗出不惡寒者。此表解裏未和也。十棗湯主之。

此證與結胸頗同。但結胸者。邪結於胸。其位高。此在心下及脇。其位卑。然必表解乃可攻之。亦與攻結胸之戒不殊也。其人熱熱汗出。發作有時。而非晝夜俱篤。卽此表邪散解之徵。雖有頭痛。心下痞。鞭滿引脇下痛。乾嘔短氣諸證。乃熱邪搏飲之本證。不得以表證名之。見汗出不惡寒。便是表解可攻之候。設外邪不解。何緣而得汗乎。攻藥取十棗湯者。正與陷胸相倣。傷寒種種下法。咸爲胃實而設。今證在胸脇而不在胃。則蕩滌腸胃之藥無所取矣。故取芫花之辛以逐飲。甘遂大戟之苦以泄水。并賴大棗之甘以

運脾助諸藥祛水飲於胸脇之間。乃下劑中之變法也。

傷寒發汗。若吐若下解後。心下痞鞭。噫氣不除者。旋復代赭石湯主之。

汗吐下法備而後表解。則中氣必虛。虛則濁氣不降而痰飲上逆。故作痞鞭。逆氣上衝而正氣不續。故噫氣不除。所以用代赭領人參下行。以鎮安其逆氣。微加解和滌飲。而開其痞。則噫氣自除耳。

傷寒服湯藥下利不止。心下痞鞭。服瀉心湯已。復以他藥下之。利不止。醫以理中與之。利益甚。理中者。理中焦。此利在下焦。赤石脂禹餘糧湯主之。復利不止者。當利其小便。

誤下而下利不止。心下痞鞭。服瀉心湯爲合法矣。乃復以他藥下之。他藥則皆蕩滌下焦之藥。與心下之痞全不相

涉縱痞鞭微除。而關開盡撤。利無休止。反取危困。用理中
以開痞止利。原不爲過。其利益甚者。明是以鄰國爲祭。徒
重其奔迫也。故用赤石脂禹餘糧固下焦之脫。而重修其
關。開倘更不止。復通支河水道。以殺急奔之勢。庶水穀分
而下利自止耳。

本以下之。故心下痞。與瀉心湯痞不解。其人渴而口燥煩。小
便不利者。五苓散主之。

瀉心諸方。開結蕩熱益虛。可謂其備。乃服之而痞不解。更
加渴而口燥煩。小便不利者。五苓兩解之法。正當主用。蓋
其功擅潤津滋燥。導飲蕩熱。所以亦得爲消痞滿之良法
也。

太陽病。外證未除而數下之。遂協熱而利。利下不止。心下痞

鞭。表裏不解者。桂枝人參湯主之。

誤下而致裏虛。則外熱乘之。變爲利下不止者。裏虛不守也。痞鞭者。正虛邪實。中成滯礙痞塞而堅滿也。以表未除。故用桂枝以解之。以裏適虛。故用理中以和之。卽理中加桂枝而易其名。爲治虛痞下利之聖法也。

傷寒發熱。汗出不解。心中痞鞭。嘔吐而下利者。大柴胡湯主之。

外邪不解。轉入於裏。心中痞鞭。嘔吐下利。攻之則礙表。不攻則裏證已迫。計惟有大柴胡一湯。合表裏而兩解之也。太陽病醫發汗。遂發熱惡寒。因復下之。心下痞。表裏俱虛。陰陽氣並竭。無陽則陰獨。復加燒鍼。因胸煩面色青黃。膚瞶者。難治。今色微黃。手足溫者。易愈。

凡表裏錯誤。證變危篤。有陰已亡而陽邪尚不盡者。有陽邪盡而陽氣亦隨亡者。有外邪將盡未盡。而陰陽未至全虧者。此可愈不可愈所由分也。大率心下痞與胸間結。雖有上下之分。究竟皆是陽邪所聚之位。觀無陽則陰獨一語。正見所以成痞之故。雖曰陰陽並竭。實由心下無陽。故陰獨痞塞也。無陽陰獨。早已括盡誤下成痞大義。無陽亦與亡陽有別。無陽不過陽氣不治。復加燒鍼以逼劫其陰。乃成危候。其用藥差誤即可同推。

已上痞證例